

INUIT ATAQATIGIIT

INATSISARTUNI



UPA 2014/99.1
8. maj 2014
Harald Bianco

2015-imiit 2018 ilanngullugu kommuneqarfinni tamani ataatsimik ivigaasanik qallikkamik arsaattarfiliornissaq siunertaralugu Namminersorlutik Oqartussat Kommuneqarfillu isumaqatigiissusiornissaat isumageqqullugu kiisalu isumaqatigiissummi kommunit ivigaasanik qallikanik arsaattarfiit ingerlanneqarnerannut aserfallatsaaliorneqarnerannullu akisussaaffiup naammassinissaanut isumaqatigiissusiornissaq isumageqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Anders Olsen, Siumut)

Siullermik siunnersuuteqartoq Anders Olsen, Siumut Inuit Ataqatigiinit qutsavigiumavarput sunnersuutaanut.

Inuit Ataqatigiinni pingaartipparput Nunatsinni innuttaasut timersornikkut pitsaasumik atugassaqartitaanissaat piffinni sumikkaluaraanniluunniit. Timersorneq inummumut namminermut timikkut tarnikkullu peqqinnartuuvoq, sapinngisamik Nunatsinni innuttaasut amerlanerpaat aalluttariaqaraluaaat. Taamaattumik pingaartuuvoq timersornikkut atugassarititaasut pitsaasuunissaat, siammasisuunissaallu.

Inuit Ataqatigiinni ilisimavarput arsaattarfinni pilersitsisarneq taamatullu pilersitsinermi aningaasalersuineq kommunit susassaqarfianiimmat, soorlu Naalakkersuisut akissuteqaataanni tamanna oqaatigineqartoq. Taamatullu Inuit Ataqatigiinniit oqaatigerusupparput siunnersuutigineqartut pilersinneqaraluarpata, ukiup ingerlanerani qaammatit amerlasuut atorineqaratik aputip ataaniiginartartussaammata. Taamaattumik aningaasanik kr. 26 mill. tungaanut annertussusilinnik siunnersuutigineqartunut atuinissaq eqqarsaatigilluagaanngitsutut Inuit Ataqatigiinniit isigaarput.

Nalakkersuisut akissuteqaataanni takuneqarsinnaavortaaq, Naalakkersuisut kr. 600.000,00 -inik Naalakkersuisut suliaasaqarfiinit atugassiisutigineqartut iluini immikkoortitsisoqassasoq. Aningaasat taakku qulisami ataatsimi arsaattarfiliornissamut pilersaarusiornissamut atorineqassallutik.

Naalakkersuisut siunnersuutaanut, tassa qulisamik arsaattarfiliornissamik isuma, oqaatigineqanngikkaluartoq qanoq akeqarumaarnersoq qularutisaanngiluinnarpoq siunnersuutigineqartuniit akisunerujussuusinnaajumaartoq. Inuit Ataqatigiinniit isumaqarpugut aningaasat kr. 600.00,00-it timersornerup iluani allatut atorluarneqakuttoorsinnaasut Taamaattumik Inuit Ataqatigiinniit siunnersuutigineqartut tamarmik ilalernartinnagit oqaatigisavarput.

Inuit Ataqatigiinni isumaqarpugut nunarput tamaat isigalugu timersornikkut atugassarititaasut siamasissumik peqqissaartumillu pilersaarusiorneqartariaqartut. Ilaatigut nunaqarfiit susassaqatitsiniarmikkut pinaveersaartitsinikkullu annertunerusumik ikorfartorneqassappata, taakkunani ilaatigut timersortarfeeqqat piffinniittut qanimut suleqatigalugit, kiisalu aningaasalersorneqarsinnaanerat allatut immaqqa aningaasaateqarfiit eqqarsaatiginerullugit annertunerusumik pilersiortorfigineqarnissaat aqqutissiuunneqartariaqartut.

Inuit Ataqatigiinit taamatut oqaaseqarluta, siunnersuut ataatsimiititaliamut susasaqartumut sulia-
reqqitassanngortillugu ingerlateqqipparput.